

PIHLMON

Wargahng Agweed Poale Yihr Pihlmon

Rob Ke Nying Warga

Pihlmon anahg ngad yiiho me ngahj. Ngo anahg ngad akuud yaa yiiho gihr Kloajya kede a yihre anaa ubaahng me nyinge Onecimuj. Ubaahng gihn ngo anaa agoohd oogo bang Pihlmon. Onecimuj arom beehn ne roohmo ke Poal e Poal nii thijin, noono, maa arub Poale yihre udooonge ne ngad yiiho. Poal warga gihn ni agweede yihr Pihlmon beere Pihlmon cwihnye duue ke caahn rih ubaahng gihre udoohr gene. Onecimuj abeehn Poale ne oohr caahn bang Pihlmon. Ngo aohre beere Onecimuj be beehdo neehn ubaahng me lubo awii piny yihre cog abea ubeehde neehn ngad yiiho maa wad thiow.

Kaa Acaan Luube

Lum umodho 1-3

Leej yihr Pihlmon 4-7

Kway wong Pihlmon ke nying Onecimuj 8-22

Gug luubo 23-25

Maahdh Yihr Pihlmon

¹ * Yihri yih Pihlmon.

Warga gihn ni aay ke banga a Poal. Awaahn ni a nii thijin ke nying gihn nahga ngad batien Jeacuu Kriihjto. An kede a Timodhy ge beehda umiiho ke nying Jeacuu kede a ge beehda ngad akuud yaa yiiho yih amaahdh wane. Yih beehda gom wan me ne cohg yi tiihj ke nying Jeacuu wa kwaad gihn tiihy wane. ² † Apya ge beehda nyemiiho

* 1:1 1:1 Timodhy: 1Kor 4:17 † 1:2 1:2 Rom 16:5Arkiihpo: Klo 4:17

ke nying Jeacuu maa ayiiho, ngo amaahdh wane, kedea Arkiihpo ge cuung tiehd ke won yi puohny Ciig Beer maa akuud yaa yiiho ge kway Juog paari ge amaahdh wane thiow.

³ Beehn Juog Wuur kedea Jeacuu Kriihjto Ruohdh cub gene muuny kedea doohr yihri.

Poal Koohr Juog Amuohje Ke Nying Pihlmon

⁴ A beehd kaa muohj koohr Juog e wuora nea a ukwahyo ke nyingi. ⁵ Koohr Juog muohja muohjo bang gihn ngo alihnga bang nyoge kejea yih poohd kaahn dhe yooohn ayiichi lum Jeacuu Ruohdho kedea yaa ayiih lum Juog ge nyaari nyaaro. ⁶ A ukwahyo kejea nyaahro gihn nyaari yaa ayiiho ge adoohng ne ge wuud miihu kedea ge nyemiihu ke nying Jeacuu yih meehg nyaahr nu dead yihdh gihi beeye cang ge acub Juoge yihro ke nying Jeacuu. ⁷ Cwihnya med keraahyo kedea cwihnya ameehgi ngahmo ke nying nyaahro gihri kedea ke nying kony ge konyi yaa ayiiho.

Gihn Daahd Poale Ke Robo Yih Pihlmon

⁸ Nea maano yih be maa ne tiihy gihn daahda utiihyi ngo keehd me nud tee maa acub Jeacuu yihra me maa yihn ne tiihy gihn daahda. ⁹⁻¹⁰ †§ Abea ke nying nyaahro gihn ayoado bang Jeacuu e ne kwaya wongi beere ngo tiihyi tiihyo. Wongi akwaya, a Poal ge beehda ukiihj e amag yi thijin ke nying puohny lum Jeacuu Kriihjto, kejea konyi Onecimuj. Ge anaa yi thijin e ngo akonya udoohnge ne ngad yiiho noono uroome wa nyethiin yeya. ¹¹ Umodho ngo kuu anahg ngaa me ree ne koany yihri ke

1:4 1:4 Rom 1:8 1:5 1:5 1Th 3:6 1:6 1:6 Pihp 1:9; Klo 1:9-10 1:7
 1:7 Rom 12:10; 2Kor 7:4; Judea 13:1 1:8 1:8-20 1Tim 6:1-2 † 1:9-10 1:9
 Pihl 1; Epi 3:1 § 1:9-10 1:10 Onecimuj; Klo 4:9son; 1Tim 1:2

nying gihn anaa agoohde oogo rihi, abea awaahn ni ngo adooing ne ngaa me ree ne koany yihro cang.

¹² Onecimuj ge anhyaara wa nyethiin yeya, e aman oohra bangi. ¹³ Abea keehd maano e a daahd ngo ubeehde keehd an ka poohde e a nii thijin ke nying gihn nahga ngad batien Jeacuu Kriihjto. A anaa adaahd ngo uluunye kari ne kony an. ¹⁴ Abea a be daahd ubeehde kan nea padh yih naa ayiiho. Ke dhe yoohn ni, nea gihn daahda ngo atiihyi, e ngo atiihyi bang gihn yih ne daahd ngo ke tiihyo, kedea padh thiel e naa athiel yihn ne tiihy ngo. ¹⁵ Ka moogo e Juog e naa ameehg Onecimuj goohd oogo rihi unahge nihn oogo beere nea ngo uduuo e be cahg aay ne weey weey. ¹⁶ Bang gihn ge uduue bangi, e ngo buu unahg ubaahng maa now abea unahg wado ke nying gihn ayiihe lum Jeacuu. Onecimuj beehda ngaa maa anhyaara, abea ngo ngahya kejea ngo unhyaari keter me neehn kaano nahge ubaahngi kedea ngad yiiho nu.

¹⁷ Noono nea yih apahro ke nyinga kejea wo nyoge maa yaa tiihj acielo, kea lor Onecimuj beer mee wa ke ne lori an. ¹⁸ Nea Onecimuj awuohj ayuge rihi wale nea gihn me koohnyi ree nud e kea koohnyi ke an. ¹⁹ Gihn ni beehda an ne gweede ke cinga: A Poal, kwaad gihn daahdi bang Onecimuj ngo ucoala yihri. Abea wihi keá wul kejea yih be koohnya. Yih koohnya koohnyo bang gihn dhe yoohn beehdo beer ge ayoadi ngo ayoadi ke banga naa ayuga yihn udoohngi ne ngad Jeacuu. ²⁰ Nea kare nud kea tiihy gihn kwaya yihri yih umiha ke nying ruohdh. Tiihy gihn kwaya bang gihn wo beehda yaa batien Jeacuu. ²¹ Keehd man gweehda yihri ni, e ngo beehde ngahya kejea gihn akwaya yihri ngo utiihyi adhaahr ukaali wiihe.

1:13 1:13 Pihp 2:30 1:14 1:14 2Kor 9:7; 1Pii 5:2 1:16 1:16 1Kor 7:22;
1Tim 6:2 1:19 1:19 1Kor 16:21

²² Gihn moogo me daahda ke robo yihri nud. Gwiir kar beehdo yihra, bang gihn ngo gaahna gaahno kejea Juog wiih kwaj gihru ngo uduue umeehge an lony oogo yi thijin, ne ci ne lieu wun keehdo.

²³ * Eparuj wu amaahdhe, ngo nii thijin banga ke nying gihn tiihye ke nying Jeacuu Kriihjto. ²⁴ † Thiow Maarko, Arijtarkuj, Demaj kedeä Luka ge tiihy ke an, yi puohny Ciig Beer wu amaahdh gene.

²⁵ Beehn Ruohdho Jeacuu Kriihjte cube muunye yihru cang.

* 1:23 1:23 Epabraj: Klo 4:12 † 1:24 1:24 Maarko: Tiihy 12:12; 2Tim 4:11Arijtarkuj: Klo 4:10Demaj kedeä Luka: Klo 4:14

Anweehd Me Nyaahn

Luwo: Anweehd Me Nyaahn New Testament

copyright © 2003 Wycliffe Bible Translators, Inc.

Language: (Luwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 13 Jun 2022

ba8353b1-57d5-55f2-870a-7ae8e7acbe62